

榴
經
堂
類
纂

籀經堂類藁卷第二十

晉江陳慶鏞頌南撰

記

重修泉州學宮碑記

泉州學宮建自宋太平興國郡守喬維嶽來治是邦準定星
為位置繫以縣本無疑義後為妄者侈而西文運略賴大
觀中龍圖閣學士柯述始復舊觀然殿廡堂齋廊宇庖廩
規模猶略也紹興朝劉子羽泣泉乃闢庑門西向河以浚
池以鑿穴引水導東南隸迄明史定墨從之略加改舛陡
門之西向而南徑仍西折購路以南地直通衢作二橋

跨河遙廟門于外尋復於東北阿建尊經閣南瞰羅紫北
枕朋清人文遂為八閩冠嗣是代有修葺道光甲午秋雷
從殿角起棟毀于是都人士謀所以興建議成啓事醵金
諏吉日卽於乙未春三月舉畚揭版之興首大成殿殿以
南兩廡惟縮載南及于大成門其外櫺星門廟門學門亦
惟縮載畢乃施工于崇聖祠度以几東迤明倫堂度以筵
筵與几廣尋深尺如初扶出樹檝以為坊置柵以為門興
賢育英旣建次作亭海濱鄒魯廡署泮宮禮門義路庭池
橋梁堂塗門街廚庫惟修然後黜之堊之髹之腹之加密
右焉竣將事尊經閣名宦祠鄉賢祠適夷氛告警寢乙巳

冬復集邦人踵前修葺乃事啟乃工迄丁未月在辰一閱
二祠治輪奐重新翼如也計匠作前後縻白金九千有奇
昇役也鳩工必飭庀材必良一椽一桷一采一範一竿一
磬一砌一甃一甌一甔一甔一甔皆真其價物書而揭之無浮銷無
冒蝕衆論翕乃服落成置禮器登一鉶二簠二簋二簋十
豆十太尊一犧尊一象尊一山尊一霤尊一著尊三彝一
簠一壘一洗一爵三樂器琴六瑟四笙六簫六笛六壎二
簠四鐘一搏拊二編鐘十有六編磬十有六楹鼓一足鼓
一鼗鼓二相鼓二祝一敔一煌煌乎大備也則且為之歌
雅虞業維縱賁鼓維庸於論鼓鐘於樂辟雍美哉其盛乎

為之歌頌松桷有槩旅楹有閑寢成孔安宮牆峻而髦士登也斯文其蔚而日盛焉爰慄而識之槩諸石

重修惠來學宮碑記

人於天地能與參者唯孔子天地祀南北郊不屋而壇明至敬孔子集堯舜禹湯文武周公大成為詩書易象禮樂春秋教萬世其功在天地天地不屋人有屋故為宮以祀滿天下立學其制祖成均董仲舒謂成均五帝之學文王世子天子視學命有司祭先師先聖天子視學即成均也先師先聖古之有德有學者或曰即樂祖若虞后夔漢定周公為先聖孔子為先師其郡國建學視辟雍皆並祀自

魏始以特祀祀孔子洎晉迄隋因之唐乃復舊章如漢禮
嗣詔州縣皆作孔子廟服衮冕南向顏冉以下東西面序
列樂用宮縣牲太牢於是郊社而外祀典定一尊潮故海
濱鄒魯也昌黎文公來刺於州文教被焉惠來抱葵山虎
頭之勝文昌雙髻之奇其水則大陂之澳赤沙之灣環焉
地靈人自傑黌宮建始有明嘉靖五年地當縣治北繼移
治東國朝乾隆初邑人修之其賢能多興於久之圯嘉
慶時有青烏者易置方位文風略頓迄今廿有餘年矣參
軍方君重巽倡始集薦紳鳩貲重建以道光二十三年龍
集癸卯十月興工凡寢廟椽桷枅栱亲稅楫杙畧剝蝕

易以其材之牢者緻者礪者頽者輪者困者領於建砌於
雕約椽皆與自轍之改廟迤而右尊經閣其南西齋其南
鄉賢其南明倫皆南向迤而左名宦祠其南東齋其南敬
一亭皆南向今折以定之中還舊觀殿上為楹九內夾室
三後殿兩廡廣尋度以筵置塾皆如故迤尊經閣於東北
宮折而南東齋一表明倫堂二表紀勛祠三表船用新出
堂塗復門孰表于更衣所新南浚泮宮琿池其橋如環新
西降省牲所葺用舊北表於名宦祠因明倫址舊如三表
右迤表於敬一亭新印而北向賢視明倫如二表西齋視
東齋如一表自此表至于南表燕居亭緣內縮櫺星門緣

外豬南自東表至于西表騰蛟起鳳二坊從牆內徙凡表
皆新仍古式也落縣長率博士弟子燕而成之縻白錐凡
二萬有奇乙巳秋重巽之子策韜都試來京請余記余為
詠斯干之詩曰如跂斯翼如矢斯棘如鳥斯革如翬斯飛
君子攸躋言考室而君子攸升也又為之頌靈臺之詩曰
於論鼓鐘於樂辟雍言學校成而文治能振興也惠人於
此觀禮講堂習容射圃進而登之為辟雍三老五更漢之
桓榮伏恭由此其選也孔曼且碩奚斯所作刻諸石紀奚
斯也謹蔡識移置顛末叙次如右

重修陳江三世祖祠堂碑記

君子將營宮室宗廟為先故新宮之茨墜與守祧之修除
典禮並載我三世祖仕榮公開基陳江族人於其地立廟
祀之存明德也伏念吾陳入閩據大成譜凡四派其一始
自晉季方公七世孫邁假福建節度使居莆僊是也其一
始自南朝伯恭叔卿叔文叔儉四兄弟封閩居福州泉州
及建安是也其來自唐者二一元方公十世孫政鎮守漳
州其子元光世襲為刺史一太傅公邕入閩建南院厥後
翻居莆陽洪進居清源皆其裔四派門第各相當校葉自
蕃衍吾錦亭舊譜系稱本籍光州考古史其自光州來者
晉文奮先生潤以南海太守尹福州先於始祖墓表著之

詳矣閭於季方公為八世孫而邁於季方公為七世孫則
邁一派卽邁一派實祖季方通四派同祖太邱或云五代
鼎革閭姓均託光州固始其言恐或不實然譜史皆符信
而有徵惜代遠年湮司牒失其傳紀系者第自宋遷祖靈
源公始再傳為宗惠公三傳卽仕榮公宗法靈源公當為
祖宗惠公當為宗二皆建祠於錦亭之象畔鄉而仕榮公
則宗惠公元子而實靈源公元孫也禮繼禰為小宗仕榮
公當繼禰其與有大宗而無小宗者異且抱器來遷自錦
亭視之固宗而自陳江視之亦祖則亦在別子若始來者
而不得執以士無三廟之說向祭於寢洎我高祖時麗菴

公潔臣公以伯仲為都督始克謀於其族建為祠顏曰福
埕分派福埕本錦亭舊居示不忘祖也顧公之行誼譜弗
詳所可知者生當元明滄桑以齒德重於鄉就陳氏故土
居陳江娶夫人盛氏亦善家法為壺范宗記曰無美而稱
之是誣也有美而不稱是不仁也不知而稱之與誣同有
可以稱而卒莫之稱則亦與於不仁之甚無已請觀後之
子孫繼世以來房分五支各以孝弟力田為業其顯者文
則視草西清武則秉鉞南國科第繁相接椒聊之實近而
安平滄江東店玉塔桐城內外廂遠而臺澎仙谿民赫積
於冊而銅山一支聚族而居就盈數猶冠號陳江則非公

之明德有後何以臻此慶鏞丙午回籍歲時承祭見其垣
宇麤靈煙剝漸就傾塌告諸族老醵金修葺言未畢被
命入都越四年以辦理團練抵閩聞堂寢易舊而新計為
弓以古尺六尺四寸為步當今四尺八寸為步度之方九
十步堂廣而三步修九四尺為楹三內寢室一左右夾室
各一降階下東西廊楹二廊外塾亦楹三中為大門兩旁
夾雨窗雨小門附焉廣如堂修三之二自堂至內門皆西
向出中庭轉外門門北向其規皆如舊復於祠之右旁拓
地四弓為楹七以為與祭齋宿之所經始於咸豐二年七
月戊午訖工於四年正月辛巳糜金錢一千二百緡董其

事者裔孫彭年升祺振纓祥雲長齡重澤斷虜丹黝畢相
興落而成之既而謀刻豐碑謹述其發祖之由與創建之
力立於庭側循古禮也後之來者其入而知敬焉

玉屏紫陽二書院經費碑記

廈門海島也商賈殷闐輻輳冠全閩民之多既庶矣舶之
聚既富矣而復立師教以培養之甄陶之舊有玉屏紫陽
二書院玉屏歸興泉永道課紫陽歸廈防同知課經費皆
綽有餘供自道光辛丑海氛告警所存息蕩遺於是二書
院併為一邑百余主講其地興泉漳永肄業來者屢紛紛
滿戶外膏火恆不給慙如獎賞力弗及支適邑紳觀察林

樞北國華過訪余以此事告之語未畢慨然曰是先人志也提金錢六千緡先為倡議定告諸兵備史蘭舫渭綸兵備告諸司馬俞謙齋益來院履聲相接踵慙慙提捐皆曰諾簿正史如林之數少半數俞如史之數大半數其在于林則五之三也釋奠為純萬盈數也遂發商經紀董其事者舉人呂世宜葉化成馮謙光陳駿三畢請勒石以垂諸遠余惟玉屏紫陽二書院昔分今併倘得有力者擴而充之仍照舊章以廣育德則師立而善多也諸士勉乎哉是為記

龍泉寺檢書圖記

歛程侍郎春海先生器宇汪洋為學根柢兩漢師說余向
心佳久之乙未以少司徒掌農政余為其屬在公詢及蒙
器瘠格命親就講席余時適有王伯厚詩攷之校質疑得
是正且眎及天文地理與夫古儀器制度畧頡史籀船書
精意窮源達委聆若發蒙余請公箸讀之公謂開元占經
徵引多古書古義嘗從事數年以抄本魚魯烏焉屢欲加
讎校役于公事未暇舉戰國策自漢劉子政校定至宋嘉
祐間已多散佚今所傳皆出曾南豐重校本高誘注隋時
止存廿一篇今僅存十篇鮑彪注行而高氏注芟棄擅易
為第學者病之然世有剡川姚伯聲本頗稱完善端緒尚

可尋曩元和顧氏廣圻嘗欲仿杜征南于左氏春秋之意
撰為戰國策釋例五篇一曰疑年譜二曰土地名三曰名
號歸一圖四曰詁訓微五曰大目錄因思晉杜預有春秋
地名宋王伯厚有詩地名攷

國朝若閻伯詩之四書釋地胡朏明之禹貢錐指梁處素
之左傳補釋與地皆有誤述唯國策地里向無專書乃與
溧陽狄孝廉子奇搜羅舊籍創為體例誤為國策地名攷
一書并參酌古今圖說繪為分圖合圖以補高誘鮑彪吳
師道諸家所未備稿猶成而未質正大仄余聞之而嘆公
之修學考古實事求是其功當不在班孟堅地里志鄺善

長水經注下夫古重九能之士其一山川能說史載潘京
辨武陵郡名崔慰祖答地理十餘事裴子野知白題滑國
所出李百藥識琅邪刈稻所本賈耽圖天下郡國劉敞以
松亭徑路質虜使當時著為美談矧國策為先秦舊書上
以按禹貢山川春秋地號沿革異同下以證漢魏晉唐地
名變遷郡縣更置城聚趨徙胥于是書為關鍵焉蓋梓之
以惠來學公曰待補苴請為定廼言猶在耳而公竟以丁
酉秋七月邁疾薨于位越九日停櫬于都之城南龍泉寺
儀徵阮相國師慮遺籍散棄命其家檢所著錄并率鏞與
汪孟慈憲孫何子貞紹基就寺中校之公所誤經說天文

說古器說厯落積于麓難卒理惟國策地名攷二十卷抄錄完帙得檢以俟諸剞劂氏夫公于經史子集金石說文旁及九流七略靡不淹貫地志特一斑耳其推步占星常合時事道光十五年歲在乙未木火同度公謂當有火災已而果驗前奉

詔纂修春秋左傳讀本叙錄微義以賈服注正杜氏之謬俾讀春秋者得所宗仰視學黔中嘗刊岳本五經頒之庠以爲多士式詩集之梓行于世者有北湖唱酬集橡繭詩數十首此外吟詠甚夥異日搜輯合彙當爲來學惠鏞得聞公緒餘故卽公之所學者言之至其經濟則職在太史

當傳之不朽不復贅今為繪檢書圖藏置龍泉寺中以誌景仰公之意并以誌相國師之愛惜人才提唱之功為大也是為記道光十有九年正月既望

苗仙露檢韻圖記

古音久失其傳顏氏家訓音韻篇云古今言語時俗不同著述之人楚夏各異蒼頡訓詁反稗為逋賣反娃為於乖戰國策音勿為免穆天子傳音諫為間說文音夏為棘讀皿為猛字林音看為口甘反音伸為辛韻集以成仍宏登合成兩韻為奇益石分作四章李登聲類以系音羿此例甚廣今欲追溯古音非好學深思不能得也吾友仙露精

于六書音韻。霍守顧氏亭林之學。多能引伸而證明。積數十年。于斯著有說文聲訂。聲度表。諸書近當將次付梓。余過從出所繪檢韻圖一冊。屬余題。蓋以知用力之所在矣。夫古韻之學。一失于梁沈約紐字之圖。再失于唐神珙字母之說。至明陳季立創始古音而我

朝顧氏沿流溯源。得千古絕學之傳。著為音學五書。斯道大備。蓋古無所謂韻出口成聲。聲成文。謂之韻。鄭康成注六經。高誘解呂覽。淮南許叔重。說文。劉熹製釋名。始以譬況假借證音字。而古語與今殊別。其間輕重清濁。猶未可曉。加以外言內言。急言徐言。讀若之類。其義已足自韻。

書蜂出而今讀與古讀絕相遠今仙露一一撥而歸之正
豈非音學中一大快事或疑古無韻字段氏茂堂以均代
韻幾于劉郎之不敢題糕余近考齊侯罍銘識得泰均二
字竊謂泰卽七均卽韻古多段泰為七泰均猶七均卽七
始也說文有囀字從言從勻省籀文囀不省鐘鼎文有勻
字篆勻亨介乎言與口之間當卽韻字蓋古文簡約從口
勻聲作均籀文繁縟從言作勻小篆省作勻鐘鼎文則或
作韵從口從言從音皆一義也惟韻字乃俗作國語樂以
立均均當是均鄭司農周禮注云均調也樂師主調其音
則均均亦同聲相段與今因考檢韻附錄于此是為記

蓮社證因圖記

己亥之秋七月七日黃子容石葉子潤臣告余曰京之南有觀音禪院池樹蒙密魚鳥親人且其地主為蓮衣上人能詩通史當此新秋初霽潏暑漸稀微波始動盍往遊乎余躑而諾之至則鴻臚葉君共潭吾宗雲伯大令秋穀明經皆在座上與偕曲磴步幽林聽蟬聲之上下覺清籟之蕭疎爽然乎其思晬然乎其容栩栩者如莊之寄濠園如陶之到武陵而蓮衣主人出觀其顏岸然聆其語藹然無有聞無有思恍然識悉檀達者讀周公孔父之書也又豁然識支那賢者一切讀周公孔父之書也遂舉筆賦詩寫

其所抑鬱者其所寂寥者其所因緣者其所證果者坐對
忘言吾烏知漆園之莊不卽如是聞不卽如是思耶吾又
烏知武陵之陶不又如是聞不又如是思耶既聞蓮衣隨
雲伯拄錫而南其亦天之巧為作合示明月之卽前身歟
書之以告黃葉二子

環翠亭記為王月船光錫

永之鎮山枕大鵬望之蔚然深秀而其傑而高出者此山
之環翠亭也亭之建始日月文無徵徵諸獻瀋熙中朱子
與陳休齋往還日相從憩遊其上山自是以靈而亭亦因
之不朽第年代愈遠興廢迭更雖舊址遺垣山靈呵護而

賢者勝跡往往待其人以治蜀江王君洎永之二年與多
士倡修是亭既成書來屬為文以記余謂永多名山樹木
蒼蔚其所以供登臨之樂寫逸興而抒幽懷者所在皆有
而都人士必肅瞻於是景行私淑相與愛之慕之刺是邦
者亦樂其地僻事閒仰而望山俯而瞰泉每念先賢流風
餘韻穆然思敬弗令湮沒不彰豈非歐陽子所謂慕其名
而思其人者多歟顧山川因其人而勝而山川之勝亦必
得其人而後寄苟非其人則徒視為遊玩之所而聽其為
興為廢卽山亦未必樂而顧之又安能慕其名而興築耶
君前權泉篆綽有政聲至是來治於永汲汲善施於民

樂其業暇日登茲亭以四望但見山高水清桑麻稠疊拱
輝而挹翠者蓋十餘萬家因板其頽垣治其舊榭俾數百
年先正遺規大觀頓復則觀君之所為而君之志與其所
以景仰於其人之善可知矣安落士民詠而歌之則君之
為政於永又可知矣余又願君之勤恤民隱愈加無已體
朱子愛民之心為心而步休齋與人為善之至意則其績
與亭為不朽而登高而流覽者念君流澤之遠卽如君之
念朱子與休齋流澤之遠漠然重見廬山面目笑語皆真
若夫山石崿翠佳花異植之美與夫大塊煙景出入於浩
渺無限之區足以備文人吟咏而極四時之致則覽者自

得之毋庸縷述余為本其山川道其風俗之樸以見永之人共樂乎此是為可嘉也於是乎書

孔繡山致經堂續記

左傳載韓宣子觀書於太史氏曰周禮易象春秋在魯則魯國藏書由來舊矣自聖人出而纂修刪訂經遂名厥後遭秦祖龍幾付一炬幸而秦書藏於孔壁經得復行於世則傳經存經皆孔氏力也顧車服禮器盡在於魯其石刻碑誌孔林稱極盛藏書一事其典闕如繡山聖裔也有志窮經因取陸桴亭致經之說以願其堂余謂經浩如淵海加以後代著述益多固不易致考崇文書目及書錄解題

諸書所載美不勝收卽范氏天一閣猶未能及萬一然有志竟成俟之以其時充之以其力譬如愚公移山子又生孫孫又生子孔氏多賢隨收隨錄必有能繼之者漸底可觀闕里為文獻淵藪四方將於是考禮而經者聖人之所自作傳是經者皆傳聖人之傳則亦以聖人之書寄之於聖人之地為還其舊而已昔周以五史掌書而藏之柱下蓋以備鈎稽防散佚也繡山祖述世德謹守高曾矩矱枕肱恆於斯鑽仰恆於斯異日當必以經學鳴於世者漢有子國唐有沖遠而

本朝則屏軒檢討淵源嫡派也爰樂而續為之記

東皋蘭譜記

東皋見潘岳秋興賦李善注以為水田曰皋東者取其春意融和而吾皋王氏世以東皋名按唐書隱逸傳王勣遊北山著東皋子五卷厥後呂才陸淳為編次梓行於世勣太原祁人閩自武肅王分派皆祖太原省園先生其裔也居龍唐清修善行額廬曰東皋示不忘本也其子約亭遷郡城築別墅仍以是為名確守宗風嘉慶癸亥建祠宇奉祀祀焉以左塾為家學命族人肄業其中道光丁未文孫節齋部郎謀宗鄙鳩緡置田為歲費余喜其能繩祖武而家學之漸以昌也於是乎書

辟疆小築園記為蘇州顧湘舟沅

辟疆主人問於留耕田父曰僕有數弓之畝築於葑門之西甫橋之左子盍為我誌之乎田父曰辟疆本晉顧氏名園君家物也志稱臺館林泉之勝西晉以來號吳中第一其在是乎其在是乎雖然自晉而唐而今地主幾易姓矣唐顧況詩辟疆東晉日行樹有名園年代更多主池澹復裔孫據晉及唐園已異氏相傳有所謂和豐坊者有所謂五顯廟者一變而為宅再變而為廩為館今皆湮沒弗考滄桑之感廢興幾何園之不能長為顧氏有常數也園之復為顧氏有異數也且吾聞顧氏世德西漢有悌者以孝

聞築其橋曰顧家橋東漢有訓者以友閒築其橋曰百口橋而陳黃門侍郎野王以文學顯祠在金閭廟貌崇焉是園與橋與廟皆顧氏清芬之守並在姑蘇興而復之賢子孫事也主人曰若夫園之興復旣聞命矣烏有行之宜而可垂之則者乎居之安而可資之深者乎請卽園之命名略示大意以鍼僕之蠢愚田父曰蒙未履其地烏足以知其勝也按圖而索之而恐其近於幻也然細讀嚴子保庸所撰記栩栩乎如身入武陵之桃源焉如足躡金粟之洞天焉其居中而最勝者謂之思無邪之齋翼然高曠俯瞰十笏排列階前復有青牛文梓平仲君遷旋繞左右循齋

而西有屋焉謂之不繫之舟其卽莊子虛舟之謂乎下而少西曰心妙軒取靜者心多妙也軒北為清照泉古井在焉泉之上曰據梧樓翠竹碧梧相與森蔭乎其中下而少北曰金粟草堂上其堂者時聞木樨香堂之西為如蘭館其上曰春暉閣循彼南陔言采其蘭於館有焉誰言寸草心報得三春暉於閣詠焉由是出堂塗以西偉然鉅觀者藝海樓也藏六藝一百三家諸子百八十九家儒法兵農稱是彝卣金也碑碣石也其五光十色滿壁而琳瑯者則樓之下吉金樂石齋也又西為傳硯堂紀先中丞怡齋公賜研之所藏焉堂左建樓曰白雲深處將以奉母夫人願

養樞僂滋益恭自西表至于東表則冷然而清者池青鱗
赤鯉時出踴躍面池而南為古泉精舍舍外巨石爭奇迴
巧絢爛柳子厚所謂若牛馬之飲於溪熊羆之登於山不
是過焉石盡得一樓一亭樓曰得月先樓亭曰不滿亭二
者斜直而立亭影與樓影常相映下亘螭龍為飛橋其先
世顧家橋百口橋流風猶有存焉者乎於是循橋而南還
於思無邪齋余考古人作室卽示以修身之義齋絜也籀
文為釁言戒絜也屋與也言其中溫與也軒舉也義取軒
軒霞舉也樓婁也言牖戶之間諸射孔婁婁然也堂猶堂
堂高顯貌也館為觀言於上可觀望也易觀我生進退也

閣度也所以度書籍也舍息也言於中舍息也捨相厨皆
一義也亭停也人所停立也乃於齋之四隅為銘焉于屋
為銘焉于軒為銘焉于樓為銘焉于堂為銘焉于館為銘
焉于閣為銘焉于舍為銘焉于亭為銘焉齋西南隅之銘
曰視爾奧毋呶毋傲思無邪動而勿躁齋西北隅之銘曰
視爾屋漏莫予云觀思無邪以祛恂慙齋東南隅之銘曰
視爾窔毋曰窔窬思無邪斯德斯邵齋東北隅之銘曰視
爾宦唯饌所乃思無邪質而勿欺不繫舟屋之銘曰芥如
舟芥如舟覆杯水於坳堂之上亦汎其汎心妙軒之銘曰
皇皇惟敬心主靜靜定性據梧樓之銘曰惡乎納爽於桐

陰惡乎養性於聽琴惡乎養德於盥心金粟草堂之銘曰
金粟非馨明德惟馨如蘭館之銘曰蘭之氣薰以德與善
居久不忒蘭之性香脈脈孝子相祇以養以昭潔白春暉
閣之銘曰念彼芳暉春日遲遲愛而敬之努力及時執海
樓之銘曰浩浩淵海艱架曹窟寢于是鑱于是習而勿忘
吉金樂石齋之銘曰龍之鍾鹿之甄辨厥文識奇字鴻之
戲馬之躡精厥鑒善品題傳硯堂之銘曰密以鼎潤而光
慎之慎之毋忘先代之所藏白雲深處樓之銘曰雲其商
樓其深金護茂蔭長護此苔露古泉精舍之銘曰蒙以養
靜而正與其出山而濁也毋若在山而清得月先樓之銘

曰瞻彼望舒時盈時縮未澄厥心而曰我浴之乎未鑑厥
水而曰我掬之乎倘心冥濛曰圜曰蒙與月相對必自朦
朧雖有圓霸亦不能為功也不滿亭之銘曰毋曰持盈其
道將傾毋曰滿溢其道將戾毋曰已足其道將促以余所
聞周人敬器是卽不滿之義

籀經堂類稿卷第二十一

晉江陳慶鏞頌南撰

神道碑文

墓表

墓闕銘

墓碣銘

皇誥授光祿大夫經筵講官吏部尚書管理順天府府尹
事務追贈太子太保寶應文定朱公神道碑文代季侍
郎芝昌

道光十有八年秋八月甲子吏部尚書寶應朱公薨於位
春秋六十有八事聞

天子震悼追

贈太子太保

賜謚文定

賜祭葬如禮

詔長子百順業經出仕外其次子附生百行廩生百城廩貢生百谷附生百梅俱俟服闋後交部帶領引見天下咸歎君臣知遇之隆古今不數觀也越年其孤扶匭歸里以某月某日葬寶應某所之原與劉夫人同兆禮也前事郵狀來京屬門下士芝昌為文而神道之左伏念公以文學受知

睿廟嘉慶七年由一甲三人

賜進士及第授職翰林院編修數廩

兩朝孚嘉一德其宣猷俾嬖黷黷於總章衛室之庥襲軒
於縵或哲陽之化者不可得而詳也其經術秉哲作咎翳
之謨明疇采負曾史之淑性立聲者乃可得而述也公諱
士彥字休承號詠齋先世居吳宋時有之修者為學博徙
徐州元時寶臣為將軍明初八三始家揚州之寶應累傳
皆齒于庠其通顯者曰訥曰應登曰藩入鄉賢名宦文苑
清興克簡順治丁亥進士官御史克簡生經經生澤代邑
附生公曾祖也澤代生宗贇恩貢生公祖也宗贇生彬乾
隆乙卯舉人國子監學錄銜公考也三世皆以公貴贈封
如其官公兄弟三序長仲士達季士廉竝起家進士公累

踐清要游躋上卿計為官贊善一中允二洗馬侍講各一
庶子學士各二少詹一內閣學士兵部侍郎左都御史各
二工部兵部尚書各一吏部尚書三管理順天府府尹事
務一鄉試正考官一會試同考官二學政總裁各三
殿試讀卷官教習庶吉士各一武會試監射大臣三
上書房行走二

經筵講官四於戲公在

睿廟時翼膺非常特達之遇九年

駕幸翰林院禮成

命諸臣賦詩公獻頌九章

帝嘉賚之

賜味餘書室全部杜詩九家集注名茶文綺八角硯藍甌
杯各色十七年大考翰詹獲高等逾歲五遷其官至學士
旋督湖北學政自是而公之位業日隆矣越六年大考雋
如前擢少詹二十五年秋七月以閣學直上書房傳

皇五子今惠親王讀扈蹕避暑山莊驚聞

睿廟升遐倉猝扶惠邸詣

闕號慟跪迎

梓宮道旁

今上在梁闈召對

諭以

先帝付託甚重當據所見直陳時

上方求紹聞衣惠之言公亦進毋劾弗違之訓繕孫文定
公三習一葵原摺以上

上嘉納

御極後嚮用益殷班九列冠六卿綜理封圻

賜紫禁城騎馬公以受

恩深重遇國計民生所關悉心籌畫陳謨入告道光四年
冬高家堰掣通過水疏進河防五策

上遣使勸之次第如其言初公居翰林充

國史館纂修手成河渠一書故公於河淮最熟

帝亦任之專十一年秋

命勘河湖及十四堡馬棚漫口并大江南北被水州縣公
至駕小艇冒風濤周履各村莊問民疾苦復設粥以濟倡
捐制錢三百緡高郵雨隄災黎以工代賑其無為江壩桑
田變為滄海急請帑興修俾民得還故居十二年冬持節
濬于灣引河並督決口合龍相度高堰山盱揚糧河揚裏
河各廳分別急修緩修如式尋築黃河大隄中運兩河緯
隄次第修舉無廢法十六年夏奉辦豫皖蘇浙贛粵六省
事件道次帶查南田禁山下浦海塘南河料保泗洲挑河

工段公綜覈名實山以官海以府身後服官四十年五持
英蕩九掌文衡輅軒所至尤留心民政在荆時白遵天主
教興公撰關邪教說進奉

帝稱可命刊刻頒行嗣是而邪說息在浙時因訟戶積習
抗糧治之嚴猾者不便遂播謠言入

宸聽

上命大吏查辦事白

帝益用嘉悅下優詔嗣是而士習敦在皖時適貴池青陽
二縣水洊至穀不升公以緩徵陳得

旨賴存者無算嗣是而民生厚公之公忠體國類如此其

道築土岡排列檣礮勢劇張我兵從間道渡河抵喀城夜
破之於東門擊斃賊姪託里和卓獲安集延大頭目推立
汗薩木汗回子阿布都拉並賊妻某氏賊姪阿里雅汗是
役也斬首六萬級殪禽七千人俘器械火礮萬計然賊魁
猶未獲也公於是隨參贊略英吉沙爾葉爾羌和闐諸城
執玉努斯於故瑪幾之遂出塞追逆於圖舒克塔什及達
爾瓦斯地險且無援止存孤軍四百名於冰山雪嶺幾潰
卒竭死力克之師還

詔擢湖南臨武營衆將八年泣篆踰五年逆雅趙金隴難
作總督盧坤調赴新田桂陽一帶偵探賊踪公入羊山五

尚黃夜冒雨抓山攀箐而上抵石灰坪距賊寨洋泉八里
道與賊戰於溫家園山梁自辰至酉賊乃遁遂燔之於洋
泉道口斷其出沒接戰五晝夜燬賊房無數賊稍感奔往
街詐降公覺復進兵滅逆首趙金隴獲其黨趙金旺趙文
鳳是役也斬首二千餘級殪禽三千人俘器械火礮亦萬
計賊自是逃楊家園持不出公逐之於高山坪大挫之餘
匪悉殲捷報

詔加銳勇巴圖魯名號旋題升寶慶協以部覆補放有人
未上公之平猛也洋泉業已肅清而粵匪趙仔青復竄藍
山九巖為害大吏檄公追撲星夜至背江口適賊出徃山

劫掠邀於濠江南至銀匠沖之賊上山吹號公率衆奮力上攻手長矛札斃紅旗頭目一人礮偽旗號趙文興仍扼之葛騰沖再蹈之麻岡沖及陽南於是趙仔青暨其妻孥皆受俘

上聞嘉公功擢副將旣仍補寶慶弗及行赴廣東連州撲猛火燒排蛇兒嶺又撲猛大掌馬箭里八崗又撲猛馬鞍山礮臺嶺南由蓮花汎冷水沖鼓而西破之金竹根桃花沖大搜之紅泥田等十九沖又擊而東趾之陽公岐大古坳嗣是諸猛不復熾功竣之寶慶得

旨加總兵銜十三年補福建汀州鎮越年蒞任尋奉諱回

籍十八年起安徽壽春鎮總兵二十年嘆夷寇定海公赴
江蘇英崧防堵遂赴浙江至鎮海夷人歸我侵地弗克戰
而還二十一年浙復告警總督裕謙廉公才調充翼長八
月夷船闌入浙之外洋公察知大船三十小船八九十計
不下二萬人而我兵止五千先從大營乞濟師弗應乃與
葛公雲飛鄭公國鴻二鎮申軍約激重賞夾水而陳葛軍
於曉峰嶺鄭軍於竹山門公率於九山門二鎮連營公為
總援賊至擁上五開山船礮臺分寇葛鄭二師公率眾赴
曉峯嶺遣弁赴竹山門兩路策應轟擊六晝夜無雌雄公
乃振臂一呼礮齊發賊驚潰幾散俄賊假漢奸萬餘為

前隊復於後隊暗放冷箭火槍礮下如雨圍急公被脅猶
手執劍且擊且罵抵死不變色殞時月之十七日午刻也
嗣浙義士張先瑞見面貌如生耳際有創痕詫異知是公
權殮之與杭州巡撫劉韻珂辯確為改棺易衾殯如禮公
天性知兵嚴號令明賞罰能與士卒同甘苦故士樂為用
身大小數百戰所向風靡定海之師以援絕故潰一時敵
懷同仇蓄鄭而外唯公之師為最銳亦唯公之禍為最烈
誠使將帥協心海氛不戢將自焚乃隊整復裂君子讀詩
至清人河上未嘗不掩卷而歎也公將兵在外凡二十年
三觀

天顏五膺

召對卒之日

上追悼之天下人相與追悼之昔晉平吳策告羊祜廟唐
掃蕩河洛原功張許繪形凌煙然則公雖死猶生也公何
憾哉距生於乾隆五十一年九月十五日丑時春秋五十
有六配顧夫人子二承泗監生承瀚文生皆世職銘曰
赳赳遯公如貔如虎西靖回壘南戡荆楚蠢爾蚩夷跳梁
跋扈齒我天戈簸濤鯢戶

皇赫斯怒爰整遯公翦此鯢鯢執此醜虜鸛鵲赳赳樓船
戕戕血奸於海以靖逆波逆波猶揚妖魔復僥擊而反齧

為公神傷公復何傷銘書太常勇則兼義死登明堂公靈
赫赫誓斬妖魄公目怒張雷砰霆激蒼兕蒼兕毋收毋傲
為公復仇師鼓鼓譟

皇誥授中議大夫晉資政大夫光祿寺卿許公神道碑銘
光祿寺卿許公既葬十年其孤祖瀋與其宗屬子姓謀曰
公歿所以揚庥闡微既有史牒之文復有納幽之石維隧
道有碑龜趺螭首可以明著公之碩德禕行昭示來茲假
寵許氏子孫世世不絕而未得其人以紀之於誼有闕迺
相與來請於同里舊史官陳慶鏞既啟促益力辭弗獲命
迺論次公胄系里居涖官行政勞烈實蹟以書於碑而神

道之六其辭曰惟許氏其先太岳之後封于許春秋魯隱公十一年許始見經其子孫以國為氏世為顯姓詩有聞人至公之先諱愛以侍御史由光州固始出鎮泉漳數傳至天賜枝葉盛大家晉江曾祖世模雍正乙卯科舉人誥贈中議大夫

晉資政大夫曾祖妣氏曾氏鄭

誥贈太淑人

晉太夫人祖才高縣學生

誥贈如曾祖祖妣氏秦

誥贈如曾祖妣父繼元乾隆庚子科舉人

累贈中議大夫

晉資政大夫母氏林

累封太淑人

晉太夫人公諱邦光字汝韜號萊山年十六補郡博士弟子旋食餼二十九舉於鄉嘉慶十七年辛未公年三十二會試中式

賜二甲七名進士改翰林院庶吉士散館授編修丙子充順天鄉試同考官戊寅大考翰詹

欽定一等五名擢詹事府右贊善尋轉左晉右中允公之受知

睿廟蓋於是乎始明年充會試同考官旋督湖南學政又明年轉左中允按臨途次驚聞

龍馭升遐擗踊號呼如喪所生尋除翰林院侍講秩滿入都

宣宗成皇帝詢所過地方情形及湘楚人文甚悉累遷侍讀詹事府右春坊右庶子甲申復恭膺大考

欽定二等四名

記名升用擢翰林院侍講學士轉侍讀學士充

日講起居注官與修

大清一統志公在詞垣日久文學差使絡繹麻充文韻館

武英殿 國史館治河方略館協修纂修本衙門撰文
文淵閣校理 咸安宮總裁 起居注總辦凡所進奉撰
擬文字

帝稱可前後兩充教習庶吉士獎拔皆位至大僚辛卯補
大理寺少卿遷光祿寺卿先是奉

派監平糶廠事竣復

命

上嘉悅諭樞臣曰許邦光朕幾忘之其為人尚自誠實遂
擢今職中外咸以為公嚮用日隆乃未幾母憂去官歸窀
穸畢而疾作遂以道光十有三年癸巳八月辛亥卒於家

春秋五十有四公溫文和厚恂恂如儒生然廉而不剛正而不阿視學楚南禁絕干謁苞苴法特峻時有衛千總廖某恃符武斷素以架陷生童俟榜揭勒索為生公至案遂發試保靖於內巡所搜獲鎗弊詰知其官李潔勾引即奏

聞辦如律无使漏網任大理明罰勅法以為是職即古廷尉天下所取平犴獄必適於宜嘗鞠粵糴一案與同官往復籌議再三得平反活者百數人其為學不務艱深嘗手錄先儒理解擇其與箋注相發明者輯成帙尋繹弗倦詩古文辭一以雅正為宗其在

睿廟時恭逢祇謁

祖陵禮成撰孝德受釐論以進

旨悅其在

成廟時隨扈

東陵紀詩二十首至今猶膾炙京師書法噪一時為同輩

推重 內庭絹帖出自公繕為多所著有二思堂史論四

卷詩文稿六卷使湘小草三卷進奉文一卷榕軒詩賦鈔

四卷師曾試藝二卷湘南紀遊志五卷 國史擬稿 一

統志擬稿百數卷余於癸未計偕始識公都門愈殷就正

比壬辰通籍公以同館為前後輩不忘下顧凡筆法點畫

訓詁聲音娓娓言之不倦誠得如公主持風教士氣何患
不敦乃年未大而遽歸道山鄉之人惜之朝之人共與惜
之公聘洪夫人娶蔣夫人繼娶龔夫人子七祖培道光辛
卯優貢試用訓導後公卒祖欽殤祖泌從九品職銜亦後
公卒祖更祖武祖衡俱殤祖瀉道光己酉拔貢刑部七品
小京官咸豐辛亥舉人女二曾撰李雲岫其壻也銘曰
久矣許公績勤于學綺歲蜚聲神明卓犖溫山之柏文山
之芝和氣韞結播為歲蕤岳儲其精河收其洵著作有才
以備供奉出馳使車入捧香案多士如旆文圃雉竄茫茫
湘潭拓蠻千室春銜其華秋佩其實溫厚和平盎睟以生

與人爲善一片真誠如玉之紀無石之砢如竹之文無節
之曝孰謂徂謝曾不崇朝飄飄丹旒雪列風蕭巖巖蟠螭
以紀碩德允矣許公百夫之特聲哉于人名登于策以示
子孫刻詞墓石

博野縣知縣何君墓表

君何氏諱長敦字厚勉號禮堂晚更禮門先世盧江潯人
唐有金紫光祿大夫國子祭酒逸者家撫州邵武西鄉爲
今光澤縣君實後之何氏自唐迄宋初凡四世居是地後
徙金谿十餘傳至元泰寧縣尹功敏復還故居於是世爲
光澤人曾祖以燭贈奉直大夫本生曾祖以燾貢生贈文

林郎祖世垂候選川同考澤周貢生贈文林郎君兄弟八
人序五少魯純讀書期艾不上口及發蒙乃攻誦羣經善
屬文年十九補郡諸生二十五舉嘉慶庚申鄉試四上春
官三膺薦剡不中大挑出為直隸知縣甫到官畿南歲荒
君辦正定以西數邑賑務民獲安尋權新城縣篆歲餘更
定興鹽山衡水等篆遂即實饒陽復歲餘改授博野未涖
因公入都攝宛平京縣事六閱月還博野所至問民疾苦
繕葺隄堰城濠案無稽牘在衡水有婦溺井入寃者于獄
君到雪之在新城除滄瀛教匪餘孽捕其渠者誅之不及
眾在鹽山清犴獄據周禮上罪極拳而梏中罪極梏下罪

桂一切苛校匪刑令除去在饒陽獲盜弗服有請用爇撈
者公不許久之讞白在博野教民種木棉募匠人仿南方
織具頒諸編氓著為令治數年頌庭政清女臯囹圄且空
臣政事之暇時留心文物先是洪武中有傅俊為博野令
列名宦君立石縣城北表之近顏習齋李恕谷皆以學名
於世其遺書多散佚採訪得數種讐校定本所積餘廉先
宗祖次族黨置醮田五十畝以充祀產置義田八十畝以
勸族學間居丹鉛不釋卷於易禮詩春秋三禮論語孟子
取諸家異同鈎貫而條纂之著有愷樂堂經辨三十卷雜
著及駢體文詩若干卷文集六卷制藝若干卷棋譜一卷

皆未梓道光十有五年正月某日以疾卒於官享年六十有一娶饒宜人繼娶邱宜人子三高華高軒高昂皆國學生孫秋濤道光乙巳科進士刑部主事塋在某里某原秋濤從余學因奉父高華之命持狀屬為文以表於阡用紀其實者琢石書德以告後來如右

皇誥封宜人蘇州馮母謝氏墓表

道光二十有五年冬十月甲寅翰林院編修馮君桂芬喪其母踰月以狀屬慶鏞為文以表墓桂芬居詞館為文章侍從之臣學行醇備非是母不生是子天下由是賢知其母慶鏞不敢以不文辭按狀母氏謝嘉興人太學生諱汝

飛之女年二十有五歸於吳縣馮君智懋以桂芬官封奉
直大夫母封宜人宜人之歸也不逮事舅其姑錢太宜人
以苦節格年例未與旌典母家素饒裕至是屏羅綺服布
荆親操井臼得姑歡心娣姒或相詬諍獨於母無間言錢
太宜人既卒母持家政勤儉如初久之家稍裕道光六年
燬於火越三年又火銖積寸累數十年蕩然無有孑遺時
值冬月棲止茅舍北風淒慘母神色自若或問之曰命也
自是家復中落二十年桂芬以一甲二名進士官翰林於
是母年七十矣假歸省親為奉直君及母壽母於是喜盈
於色明年桂芬就職迎養京邸每進甘旨輒戒曰一絲一

粟皆天所生不惜必有天殃平居自奉極薄衣食裁取足
幼知書以書箕非婦職不為奉直君時出外閱久始歸內
外井井無不辦性靜寡言獨居如無人非操作不遷坐待
子女下及婢媼一以慈柔而人微憚之咸服其教可不謂
賢母歟生於乾隆三十有六年九月二十七日享壽七十
有五子四信字信衡俱殤次卽桂芬次蘭芬早卒女一適
王增桂芬將奉母匱歸葬於吳縣某原慶鍾爰書其表道
之石以告來者如表

中憲大夫馮君墓表

馮氏世居蘇門山塘北濬小港馮家濱其先自楚入吳明

興有諱惠者好行其德家以昌數傳至奇英府君諱之鉉
後更仁偉堯初府君諱義謨雲文府君諱禮瑞凡三世皆
不仕生晉中憲大夫諱智懋之字明揚號春圃行修而不
悖於先志穆而克諧於衆多士重之旣沒其孤桂芬以與
慶鏞善郵狀來京屬爲文以表諸墓謹撮其實而紀之大
節在三其事親也孝初雲文府君有子三君最幼生九歲
而孤家貧母錢太宜人撫之以績易腴從師年十四出松
江學費十載始歸於是年二十六矣畢婚家漸致小康凡
甘毳豐旨苟可以承歡者無不備致母守節三十餘年以
初喪歲格未得旌因繪移杼圖朝夕瞻仰蓋母以前所居

近囂後徙宅以教如孟母故云伏念自曾及禰三喪皆溫
墓邑之楓橋西乃躬親負土加封窆并賺近田為塋護詩
曰孝子不匱永錫爾類君其有焉其與人也忠性然諾鄉
論服之屢以質假樵遷君計有無貨居輒當無何家燬於
火逋未釐復燬質劑皆燼君必詢諸其人如券償之人咸
為君難而君脫然也具有隱德口不言人亦無從言者略
觀一二以知其餘嘗出行遇一騎者墜帕馬逸呼之不止
拾歸則玉具數事也異日尋訪確實具以還主奉百金謝
弗受其正直類如此詩曰言笑晏晏信誓旦旦君其有焉
其教子也義讀書首立品次文藝子桂芬庚子射策第二

書報諭風骨為尚勿事唯阿及癸卯校順天闈問曰得毋
遺實學乎甲辰典廣西試問如初家居崇尚廉節邑有齎
千金為賞緣者峻却之曰勿為子孫累其慎也甚於楊震
之畏四知前後兩赴京師就養繼督不少假至是

天子御極之初

詔大臣各舉所知同縣潘太傅相國以子名薦君聞益悚
動引古名臣訓示詩曰貽厥孫謀以燕翼子君其有焉嗚
呼綜君生平考弟行於家德義信於里溫和發於外而人
莫不親嚴毅存乎內而人莫不敬使達而在上必足以光
史策者而固留之以俟後之起也娶謝恭人先六年卒子

四曰信孚曰信衡俱殤曰桂芬道光二十年一甲二名進士翰林院編修曰蘭芬早卒女一王墳其婿也以道光三十年七月甲寅疾卒於京第養舍春秋八十有一越明年為咸豐元年十一月癸丑奉君柩於吳縣西長岐嶺壁字阡之原啟謝恭人壙合葬禮也用勒諸石以告來者如表錦亭始祖靈源公墓開銘

陳之先出少典世為媯氏後封陳遂氏焉自周迄漢至文範先生諱實字仲弓居潁川太史奏德星見為太邱令子二曰紀曰謚謚五傳至達仕晉為丞相掾太子洗馬達生康康生潤字文奮為散騎侍郎南海太守永和中由光州

國始來尹福州為入閩始祖生六子曰授曰豹曰雍曰虎
曰光散處各州縣吾錦亭靈源公居泉州其派也自入閩
以下至公秣數傳乘軼之禮別子為祖鄭注別子謂公子
若始來在此國者後世以為祖也公於錦亭為所遷祖即
始來者故奉以為祖公諱源字維濬宋人生嘉熙庚子五
月二十日子時卒祥興戊寅正月十五日丑時娶黃氏由
泉城元妙觀角遷象畔錦亭里其稱靈源公者子孫以其
所葬之地名之派分二支宗其繼別子者其一為宗惠公
曰長房分三支後有遷陳江泉城玉塔仙遊皆其裔也其
一為宗舉公曰二房分二支後有遷西畬安海祥芝永春

皆其裔也子孫盛大肇牽服賈遠適異邦或宦遊而隸他籍東踰甌粵北極燕薊所在皆有而錯列南惠同溪者齒日繁其數從以萬計累代報魏科登顯第或樹甘棠或應郎宿東觀西臺時接踵乎其中而其武或以奇勲偉績總元戎膺上將忠孝節廉之倫史屢見之乘不絕書蓋公之積德者深而其後之食報無窮也墓在安平靈源山麓麓鳴宮前自宋以來牧童野叟皆指其所曰此錦亭陳長者墓也蓋薰德善人太邱之遺風猶有存焉向未克表於阡裔孫慶鏞通籍回里因歲時上埽謀諸族人樹以豐碑詳其譜牒次而書之俾後世之子子孫孫式勿替於其所不

知從蓋闕系以銘曰

陳氏發祖肇衍潁川公抱英器來庇于蘓椒聊蕃盛盈萬
累千維忠維孝世守薪傳東鷄西鰈鱗冊載編瞻彼兆域
山脈蜿蜒羅裳疊翠霽水回旋若防若斧鏡臺高懸自宋
封寔今六百年樞衣百琴宜伸厥虔用揭令德以表於阡
引之無極永祈象賢

同安陳母洪氏墓碣銘

吾陳祖太邱其一為唐鷹揚將軍元光公裔七葉為漳潮
刺史子姓以蕃衍厯宋元明滋熾由漳入泉隸同安之碧
溪以儒業大其宗

國朝順治辛丑常夏冠南宮第一門族科第至今不絕近
貽胤孝廉出宰江西因假省親齋期累議鐫級

天子詔入覲復原官來都持其尊人所作母夫人薤幽之
又以慶鏞同系素不為佞諛之文言之質故可傳乞阡碣
距夫人歿十有九年矣謹按夫人洪氏系出同安儒士諱
世藝女也嬪于陳為甯德學博躍峯先生之婦而今封君
培甫諱正官之夫人少孤有兄而殤從養伯父明經世年
鞠育愛之因與學博友善悉其子賢妻焉時年十九嫁之
前期哀顯於伯父丐以其子諸生景超為父後而以從姪
為兄後得兄乃已母家僉曰孝比歸廟見棗藥之饋恭而

慎久之如初綜核中饋米鹽無凌雜學博為官挈家政昇
之稱治既而喪至痛不親含歛輟食數日服闋為夫弟妹
理婚嫁服物皆務愜姑意貲耗無恡色夫以貧故負米養
親遠涉武夷章貢客羊城累數年不得返而姑春秋日益
高甘旨燠寒惟適嘉慶丁卯姑病劇夫猶在粵也夫人百
計求醫晨昏不離側祝天乞減已算為姑壽徐而復蘇姑
曰吾念婦待孫婦來事汝以還汝事吾乃永訣耳越三年
次婦來歸姑病復作果不起夫人教子嚴而有度偶非義
必督譙之不少假課讀以漏下為程不縱不迫漸而劇之
成克戎自為女為婦以至為母一式於儀道光辛巳七月

某日以疾卒年五十有九遺命勿用浮圖子四貽棟早卒
貽紳邑諸生貽焜嘉慶癸酉科舉人貽蘭道光己亥科舉
人夫人以子貴贈如例應銘法銘曰

媼之富道無疆閭以則順而章公侯之後誕厥祥歲在太
淵獻碣眎苾溪之堂防

東莞縣丞黃君墓碣銘

故東莞縣丞黃君諱宗鴈字學冠號直齋江南道監察御
史照第四子世居閩龍溪以讀書起其家曾祖淑孕祖文
揚皆以御史貴贈朝議大夫御史於嘉慶朝以直聲聞君
隨侍朝夕稟承家訓初攻舉業力於學與昆季優薦其選

拔某並有文名入監應京兆試薦而復黜乃援例為縣丞
分發粵東始至省適御史稱疾君聞遂以乞養去官迎道
上隨侍抵家甫五日耗作得親致哀敬如禮服闋復之粵
未補官權陽江丞篆治雙魚地濱海洋艇時出沒寇救民
驚徙城市君至履村落每村設鄉兵數十人授以團練盜
始斂跡既而調新安治大鵬亦粵要區也向設額兵八百
屯其間民苦於徵徭不相能君撫循輒定市人相驚以伯
有山之怪變蝸蚶水之怪龍罔象常夜出攫人為患久矣
君昉韓公驅鱷文攘除妖遂熄蔣相國攸鈺制是邦廉其
村檄令來署判鞠疑獄所平反皆是尋遷東莞縣尉治石

龍其地煩劇甲全粵上抵博羅下通虎門商賈雲集莫須
有輒興大獄官者視為畏途君始終八年獨無罣議於是
薦升知縣

詔曰可計前後仕粵二十年卓有政聲去之日民猶泣留
滿於道性摯愛兄弟六人無間言與人交不存城府而常
以義相高遇有緩急輒代籌畫無憾道光五年八月疾卒
年若干娶安溪李氏乾隆己未科進士夔州府知府諱復
發女也後君卒年若干子三長開鼎道光壬午科舉人順
天寧河縣知縣次開治廣東縣丞三開勲墓在龍溪某里
某阡與李孺人合塋今將以表於碣爰序其世次與其宦

績以告後之來者銘曰

事親孝兮移作忠出為尉兮明而公賢厥配兮禮之宗指
嘉蔭兮碑其豐

經堂類彙卷二十一